

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI**

Broj: 32 0 St 397308 21 St
Tuzla, 09.09.2021. godine

Općinski sud u Tuzli, sudija Faruk Arnaut, u stečajnom postupku nad imovinom dužnika „Bosnafarm“ d.o.o. za trgovinu na veliko farmaceutskim proizvodima Tuzla, Mala Solina broj 8, Tuzla, na osnovu stečajnog prijedloga od strane predlagača „BIPHARM“ d.o.o. za proizvodnju i promet farmaceutskih, kozmetičkih i prehrambenih proizvoda, Bistarac Donji bb, Lukavac, dana 09.09.2021. godine, donio je sljedeće

R J E Š E N J E

I-OTVARA SE stečajni postupak nad imovinom dužnika „Bosnafarm“ d.o.o. za trgovinu na veliko farmaceutskim proizvodima Tuzla, Mala Solina broj 8, matični broj subjekta I-7640, broj glavnog računa 1610250002170034 otvoren je kod Raiffeisen bank dd Sarajevo.

II-Stečajni postupak se otvara sa danom 09.09.2021. godine u 15,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se u „Službenim novinama F BiH“.

III-Za stečajnog upravnika imenuje se Senad Uzunić iz Tuzle, ul. Izeta Sarajlića 5C.

IV- Nalaže se stečajnom dužniku i trećim licima da stečajnom upravniku predaju u posjed imovinu i dokumentaciju stečajnog dužnika koja je u njihovom posjedu.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečaju prijavi potraživanja (član 105. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

VI-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenom novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VII-Pozivaju se lica koja imaju obaveze prema stečajnom dužniku da ih bez odlaganja izvrše.

VIII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Tuzli i Lukavcu, te kod Službe za geodetske i imovinsko-pravne poslove Grada Tuzla i Grada Lukavac.

IX-Skupština povjerilaca (ročište za ispitivanje) na kojem će se ispitati prijavljena potraživanja zakazuje se **za dan SRIJEDA 10.11.2021. godine u 08,30 sati**, u zgradi Općinskog suda u Tuzli, ulica ZAVNOBIH-a bb, **sudnica S1**.

X-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka **održat će se SRIJEDA 10.11.2021.**, na istom mjestu nakon ročišta za ispitivanje prijava potraživanja.

XI-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda – elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Dana 09.03.2021. godine, predlagač BIPHARM“ d.o.o. za proizvodnju i promet farmaceutskih, kozmetičkih i prehrambenih proizvoda, Bistarac Donji bb, Lukavac, putem zastupnika društva Sulejmana Banjića podnio je prijedlog za otvaranje stečajnog postupka nad imovinom dužnika ovim privrednim društvom iz razloga platežne nesposobnosti., temeljem odredbe člana 4 i čl. 6. Zakona o stečaju („Sl.novine F BiH“, br.53/2021).

Nakon razmatranja prijedloga sud je rješenjem od 02.07.2021. godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe čl. 60., 61. i 63. Zakona o stečaju.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem odredbe čl. 102 stav 1. Zakona o stečaju zakazano je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika na koje je pristupio privremeni stečajni upravnik i zakonski zastupnik predlagača, a u odsustvu uredno obavještenog dužnika.

Iz izvještaja privremenog stečajnog upravnika proizilazi da je za društvo dužnika registrovano pod matičnim registarskim brojem subjekta upisa : I-7640. U pogledu pravnog statusa privremeni stečajni upravnik je utvrdio Privredno društvo Bosnafarm doo je osnovano 1998. godine sa osnovnom djelatnošću veleprodaja farmaceutskih proizvoda. Tržište na koje su bili usmjereni je prvenstveno Tuzla i Tuzlanski kanton, a zatim i ostali dijelovi BiH. Predmet trgovine su bili većinom lijekovi, zatim infuzije i druge medicinske otopine, potrošni medicinski materijal i slično. Imali su ugovore o zastupništvu i distribuciji sa inostranim firmama, dobavljačima: Fresenius Kabi AG Njemačka (infuzione otopine), Mustafa Nevzet Ilac Sanayii A.S. Turska (lijekovi), Biofarma Ilac San Turska (lijekovi), Nobel Ilac Turska (lijekovi), Stada Arzneimittel AG Njemačka (lijekovi) i drugi. Kupci su bili: UKC Tuzla, UKC Sarajevo, Kantonalna bolnica Zenica, pojedinačne apoteke, bolnice, domovi zdravlja, veletrgovine (Tuzlafarm doo Tuzla, Velfarm doo Gračanica i drugi). Prodaja se odvijala preko sektora marketinga, najčešće

telefonskom promocijom i uzimanjem narudžbi. Jedan od najvažnijih i najzastupljenijih kanala prodaje je preko objavljenih tendera javnih medicinskih ustanova za nabavku lijekova. Sa kupcima su pravili ugovore o saradnji, a odgoda plaćanja je bila 60 dana za apoteke i vedrogerije dok je po tenderskim isporukama rok naplate bio definisan uslovima tendera. Vršili su distribuciju robe vlastitim vozilima. Zapošljavali su između 30 i 45 radnika, pretežna stručna sprema je SSS, zatim pravnik, ekonomista i magistar farmacije. Društvo nije imalo vlastite poslovne prostore nego je uvijek bilo u iznajmljenim poslovnim prostorijama.

Društvo je imalo više statusnih izmjena koje su se odnosile na promjenu adrese, osnivačkog kapitala i usklađivanje djelatnosti. U toku 2018. godine je došlo do prenosa kapitala i ovlaštenja na novog vlasnika i direktora Sabalahajrudina Suljagića.

Prema kretanju broja zaposlenih je vidljivo da je već u toku 2012. godine smanjena poslovna aktivnost. Društvo je prestalo da posluje, odnosno da aktivno nastupa na tržištu, krajem 2012. godine jer nije bilo izgleda da iz postojećih potraživanja i imovine mogu otplatiti sve dospjele obaveze. U toku 2013. i 2014. godine prodavana je roba sa stanja i naplaćivana potraživanja. Računi preduzeća kod četiri poslovne banke su bili blokirani na dan donošenja Rješenja o pokretanju predhodnog postupka.

U predstečajnom postupku je izvršena provjera imovine u ZK uredima Lukavac i Tuzla, te na osnovu pismenih obavjesti, društvo Bosnafarm doo se ne vodi kao vlasnik nekretnina.

U decembru 2016. godine, privredno društvo Bipfarm doo Lukavac je od Raiffeisen banke uz naknadu otkupilo potraživanje po Ugovoru o kreditu u iznosu od KM 5.004.856 i steklo pravo da se upiše kao hipotekarni povjerilac nad nekretninama. Naknadno je društvo na osnovu preuzetih potraživanja od Bosnafarm doo steklo pravo upisa vlasništva nad nekretninama.

Zemljište se nalazilo preko puta sjedišta društva, odnosno u Bistarcu prilaz sa puta Doboj - Tuzla, vrednovano je u iznosu KM 1.735.047. Zemljište od ukupno 13.647 m² se sastoji od pet parcela. Navedene parcele date su pod hipoteku Raiffeisen banci kao obezbjeđenje Ugovora o kreditu a kasnije Ugovorom o preuzimanju duga prenesene na preuzimaoca duga.

Investicije u toku su bile iskazane ukupno KM 2.282.179. Od toga se na zemljište i objekat na parcelama Kiseljak i Bosanska poljana odnosi KM 2.197.760. Društvo Bosnafarm doo je 2009. godine kupilo do firme Kib Glas doo Srebrenik zemljište i objekat u izgradnji. Na navedenom zemljištu i objektu su imali dodatna ulaganja. Međutim zbog duga prodavca prema Poreznoj upravi FBiH, Bosnafarm doo se nikada nije mogao upisati kao vlasnik.

Potraživanja od kupaca su najvećim dijelom sporna i nenaplativa od 2014. godine. Ostala kratkoročna potraživanja se odnose na potraživanja stečena cesijom, isplaćen kredit kao jemac za firmu MVS Pharm, te sumljiva i sporna potraživanja. Ukupan iznos od KM 417.434 se smatra nenaplativim potraživanjima zbog zastare.

U tabeli 2. pod stakom "kredit i pozajmnice dati povezanim pravnim licima" do 31.12.2013. godine je bilo potraživanje u iznosu od KM 5.432.711 a odnosilo se na pozajmnice date povezanom pravnom licu Zada Pharmaceuticals doo (povezanost na osnovu istog vlasnika i odgovornog lica). U toku 2014. godine, društvo je izvršilo ispravku vrijednosti u iznosu KM 4.973.285.

Društvo imalo kreditna zaduženja kod Raiffeisen banke i Hypo Group Alpe Adria banke, te jedan ugovoru o lizingu kod Unicredit leasing doo. Navedene obaveze zatvorene ugovorima o ustupanju na način da je firma Bipfarm doo otkupila navedena potraživanja uz naknadu.

Od značajnih obaveza prema dobavljačima iz dostupne dokumentacije u spisu suda je priložen ugovor o ustupanju duga između Bipharm doo Lukavac i Fresenius Kabi Austria, kojim je Bipharm doo preuzeo dug.

Prema izjašnjenju privremenog stečajnog upravnika, društvo nema platežnu sposobnost, budući da ne izmiruje svoje obaveze u dužem vremenskom trajanju od 60 dana i da su mu računi u dužem vremenskom trajanju od 60 dana u blokadi, da nije u stanju izvršiti svoje dospjele obaveze plaćanja, te da su ispunjeni stečajni uslovi za otvaranje stečajnog postupka u smislu odredbe člana 102. stav 6. Zakon o stečaju.

Na ročištu za ispitivanje uslova za otvaranje stečajnog postupka, privremeni stečajni upravnik je obrazložio nalaz i mišljenje o statusu društva i ispitanim uslovima za pokretanje stečaja, te je dao obrazloženje da bi se iz osnova preostalih sredstava na ime uplaćenog predujma za predhodni stečajni postupak mogli bi se finansirati troškovi potrebni za vođenje stečajnog postupka.

Na osnovu izvedenih dokaza tokom postupka utvrđeno je da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a iz preostalih sredstava uplaćenih na ime pokretanja predhodnog postupka za utvrđivanje uslova za otvaranje stečajnog postupka u iznosu od 8.000,00 KM, mogli bi se finansirati troškovi postupka, o čemu se izjasnio i privremeni stečajni upravnik na ročištu za ispitivanje uslova za otvaranje stečajnog postupka od 09.09.2021. godine.

Sud je temeljem odredbe čl. 102. stav 4. a u vezi sa čl. 6. Zakona o stečaju odlučio kao u izreci rješenja.

Odluku o imenovanju stečajnog upravnika, sud je donio temeljem odredbe člana 104. stav 2. tačka b. . Zakona o stečaju, a nakon što je utvrdio da isti ispunjava uslove utvrđene odredbom člana 71. Zakona o stečaju.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio temeljem člana 106 Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108. stav 1. tačka a. Zakona o stečaju.

STEČAJNI SUDIJA,
Faruk Arnaut

POUKA O PRAVNOM LIJEKU:

Protiv ovog rješenja žalbu može uložiti stečajni dužnik.

Žalba se podnosi Kantonalnom sudu u Tuzli, putem ovog suda

u tri primjerka u roku od 8 dana po proteku 5 radni dana od dana objave rješenja u Sl. novinama F BiH.

Žalba iz prethodnog stava ne odlaže izvršenje rješenja.